

P'raya serentak: Taib runding dengan Najib
Malaysiakini.com
January 20, 2011

Ketua Menteri Tan Sri Abdul Taib Mahmud akan berunding dengan Perdana Menteri Datuk Seri Najib Tun Razak berhubung kemungkinan mengadakan pilihan raya peringkat Parlimen serentak dengan pilihan negeri Sarawak atau sebaliknya.

Taib, yang juga pengerusi Barisan Nasional (BN) negeri, berkata beliau telah mempunyai ilham untuk mengadakan pilihan raya negeri namun tidak dapat menentukan tarikhnya.

"Pembangking pun kecewa jugalah," katanya pada rancangan Dialog "Pembangunan Sosio-ekonomi dan Politik Sarawak" yang disiarkan melalui Radio Televisyen Malaysia (RTM) TV1 malam tadi.

Pilihan raya negeri untuk kesemua 71 kawasan mesti diadakan sebelum Julai tahun ini apabila tempoh dewan undangan negeri (DUN) Sarawak berakhir.

Ditanya mengenai cabaran dan tanggungjawab yang dipikul untuk menentukan Sarawak kekal menjadi 'deposit tetap' BN, beliau berkata politik di Sarawak masih lagi bersandar kepada keinginan rakyat untuk menikmati pembangunan yang lebih pesat yang menentukan masa depan negeri ini.

Persiapan sejak enam bulan lalu

"Jadi politik yang sumbang sikit, kurang mendapat sambutan di Sarawak tetapi di dalam bandar penduduk sudah merasa soal pembangunan ini sebagai perkara biasa," katanya sambil menambah bahawa parti komponen BN negeri, Parti Rakyat Bersatu Sarawak (SUPP) akan bertanggungjawab untuk menghadapi isu pembangunan di dalam bandar dengan lebih hebat.

Taib, yang merupakan Presiden Parti Pesaka Bumiputera Bersatu (PBB), berkata di peringkat PBB, persiapan pilihan raya telah berjalan sejak enam bulan lepas dengan mengadakan banyak seminar, khasnya bagi pemimpin akar umbi dan sayap wanita.

Beliau percaya PBB serta dua komponen BN lain, iaitu Parti Rakyat Sarawak (PRS) dan Parti Demokratik Progresif Sarawak (SPDP) tidak menghadapi banyak masalah tentang siapa akan menjadi calon pilihan raya nanti berikutan nasihat Najib pada konvensyen SUPP di Kuching pada Ahad lepas.

Ketengah muka baru

Merujuk kepada nasihat Najib agar hanya mereka yang boleh membawa kemenangan dicalonkan, beliau berkata : "Kita sudah tahu siapa yang kita nak gantikan dan kebanyakan mereka (penyandang) ini akan memberi laluan kepada muka baru."

Bagaimanapun, Taib berharap SUPP dapat menentukan mereka yang patut menjadi calon pilihan raya serta menarik penyokong baru setelah mempunyai semangat baru bagi menawan semula lapan daripada 19 kerusi yang hilang dalam pilihan raya negeri pada 2006.

Pada pilihan raya negeri lepas, PBB memenangi kesemua 35 kerusi yang ditandingi manakala PRS dan SPDP masing-masing lapan.

Sambil bersetuju bahawa isu politik dan pilihan raya adalah berkait rapat, Taib berkata persepsi politik Sarawak pada masa sekarang masih dikatakan politik pembangunan adalah memang benar.

Pada perjumpaan parti dan pertubuhan dengan rakyat, khasnya di luar bandar, beliau berkata soal pembangunan sentiasa dibangkitkan memandangkan Sarawak mempunyai kawasan yang sangat luas.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/153943>